

**Sing vooraf staande: Psalm 100:1, 4 (p. 494)**

- |  |  |
|--|--|
| 1    Juig, al wat leef, juig voor die HEER!<br>Dien God met blydschap, gee Hom eer;<br>kom nader voor sy aangesig,<br>en prys Hom met 'n lofgedig! | 4    Want goedertieren is die HEER;<br>sy goedheid eindig nimmermeer;<br>sy trou en waarheid hou hul krag<br>tot in die laaste nageslag. |
|--|--|

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die  
kragtige werking van God die Heilige Gees.

**Amen.**

**Lofpsalm 31:17 (p. 147)**

- 17    Geloofd sy God vir sy genade, / so wonderbaar en groot / aan my, sy gunsgenoot.  
     Sy oog slaan my in liefde gade; / Hy lei my na 'n veste / in veiliger geweste.

**Geloofsbelydenis: Apostolicum**

*Na die wet bely ons voor God ons liefde vir Hom en bid vir 'n nuwe lewe in ewigheid by  
Hom met Psalm 73:10 (p. 369)*

**Wet**

**Psalm 73:10 (p. 369)**

- 10    Nogtans sal 'k altyd by U bly; / niks sal my van u liefde skei –  
     U wat my regterhand gevat het, / vir wie 'k van harte liefgehad het.  
     U sal my voortlei deur u raad, / O God, my Hulp, my Toeverlaat,  
     en na die dag van aardse stryd, / my opneem in u heerlikheid.

**Gebed**

- *Doksologie:*
  - *Aanbidding:*
  - *Skuldbelydenis:*
  - *Vergifnis:*
  - *Dank:*
  - *Smeking vir die nood van die gemeente en voorbidding vir die kerk,  
     owerhede en sondige wêreld, asook die beroep op die beloftes van God:*
  - *Algemene bede:*
  - *Verligting van die Gees ter wille van die Woorddiens:*
- Amen.

**Skrifberyming 2-4:1 (33:1)**

- 1    Wat 'n liefde en volheidslewe, / waar ons bly ons in beroem,  
     het die Vader ons gegewe / dat Hy ons sy kinders noem!  
     Maar die wêreld weet van dié / wat uit God gebore is, nie,  
     het die kennis van die Heer nie / as hul hoogste goed begeer nie.

**Skriflesing:    Openbaring 2**

**Teks:            Openbaring 2:4**

**Maar Ek het teen jou dat jy jou eerste liefde verlaat het.**  
(Openbaring 2:4 AFR1953)

*'n Mens kan so ywer vir die Here, dat jy later perspektief verloor – dan kan dit gebeur dat jy in  
jou ywer die pad verloor, en op die ou end in jou ywer jouself, of jou eie saak dien. Dit het  
gebeur in die gemeente van die Efesiërs.*

Die Here het 'n brief geskryf aan elke gemeente in Klein Asië.

- Elke brief is voorafgegaan deur 'n deeglike ondersoek of die gemeentes elkeen – soos hy is – waarlik kerk is.
- Die Here het die kerke elkeen gaan toets om te sien of die kerke maar net na die buitekant toe 'n pragtige vertoon van godsdiensoefening voorhou, en of die lidmate die Here nog werklik en van harte ken.

In hierdie ondersoek is daar seker gemaak of die kerk van Efese nog die kenmerke van die ware kerk dra.

- Die eerste kenmerk was dat hulle leersuiwerheid in hulle prediking moes handhaaf.
- Eenvoudig gestel beteken dit dat hulle die Bybel moet verkondig volgens die wil en die eise van die Here.

'n Ware kerk sorg dat die evangelieverkondiging wat in die gemeente plaasvind suiwer is.

- Met ander woorde, die ware kerk laat nie toe dat die evangelie aan hom verkondig word soos 'n mens dit verstaan nie.
- Nee, daardie gemeente luister met ore van uitverkorenes – met die ore van mense wat aan God behoort en wat deur die Heilige Gees gelei word om te onderskei tussen menslike vindings en die ware wil van God.

Die tweede eienskap is die suiwer bediening van die sakramente, met ander woorde die kerk moet die Doop en die Nagmaal bedien soos wat dit deur God ingestel is.

- Die ware kerk moet ook werklik glo wat die Woord van God ons leer deur die sakramente.
- Die ware kerk mag nie by die sakramente aanlas of daarvan iets wegneem nie – die sakramente moet in vorm, inhoud en waarde gehandhaaf word presies soos wat die Bybel hulle leer.

Die derde eienskap is die suiwer handhawing van die tug.

- Hierdie eienskap vra dat die ware kerk elke mens wat dwaalleer verkondig, of dwaalleer uitleef, moet vermaan om hom te bekeer.
- As sulke mense volhard, en hulle aan God en sy vermanende liefde nie steur nie, moet hulle met die ban uit die kerk uitgesny word.

Teen hierdie agtergrond moet u die brief aan die gemeente van Efese lees.

Die eerste deel van die verslag is 'n ware ligpunt:

- In vers 1 bevestig die Here Jesus dat Hy die kerk ken omdat Hy tussen die kandelare wandel.
- Die Here Jesus gaan in elke kerk rond, en Hy weet wat in elke kerk aangaan.

Ook ten opsigte van die verkondiging van die Woord (prediking) kry die gemeente 'n mooi verslag.

- In vers 2 skryf die Here dat Hy weet dat hulle die leer suiwer handhaaf.
- Hy weet dat daar mense opgedaag het wat aan die gemeente gesê het dat hulle apostels was, en dit toe nie was nie.
- Die Here Jesus getuig dat die gemeente van Efese sulke manne eers ondersoek het, en hulle op die proef gestel het, en as hulle vals was, het die kerk elke keer hulle dwaalleer blootgelê.

Die gemeente van Efese het baie moeilikheid gehad met sektes en met die heidene.

- Dit kon ook nie eintlik anders nie, want die grootste tempel vir 'n afgod het in hulle stad gestaan.
- Dit was die tempel van Diana, waarheen duisende mense uit die destydse wêreld gegaan het om te aanbid.
- Dit verklaar waarom die kerk van Efese so hard moes stry om suiwer kerk te bly.

Hulle was deur God in so 'n situasie geplaas dat hulle die geleentheid gehad het om te getuig en te stry teen valshede van buite.

- Die Here Jesus getuig nou dat Hy ag gee op hulle doen en late.
- Hierdie voortreflikhede het Hy raakgesien.

Maar Hy het tog ook die verkoeling in hulle liefde waargeneem.

- Die gemeente se eerste liefde was die Here.
- Hulle het die waarheid liefgehad en kon die kwaad nie verdra nie – maar intussen het daar iets verkeerd in die gemeente ingesluip.

Verder getuig die Here dat hulle hard werk in die gemeente van Efese, en dat hulle lydsaamheid besit ter wille van sy Naam.

- Die Here weet hoeveel moeite hulle gehad het om hulle geloof suiwer te hou.
- Hy weet ook dat dit altyd met smaad van buite gepaard gaan, en met innerlike droefheid wanneer hulle tekortsiet in hulle stryd.
- Dit verdien lof dat hulle ter wille van die Naam van Christus nie moeg geword het nie, maar aangehou het met stry.

Hierdie gemeente het die tug ook streng gehandhaaf.

- Hulle het die werke van die Nikolaïete gehaat.
  - Die Nikolaïete was volgelinge van Nikolaus wat in Handeling 6:5 verkies is as 'n diaken.
  - Hierdie mense was die mense wat verwaand was en wat hulleself in hulle tyd as die beter mense beskou het.

Die Nikolaïete het gedink dat hulle 'n wyer uitsig op die lewe het as wat die ander verkrampde mense het.

- Die gevolg van hulle lewensbeskouing was dat die Nikolaïete hand aan hand met die wêreld begin lewe het.
- Hulle was die mense wat afgesien het van die nougesetheid van die gebruike in die kerk.

Daarom het hulle vasgehou aan die leer van Bileam wat deur Balak geleer is.

- Ons lees mos in die Ou Testament dat Balak vir Bileam laat haal het om die Israëliete te vervloek.
- Maar presies die teenoorgestelde het gebeur – teen sy sin het Bileam elke keer die Israëliete geseën.
- Omdat hy toe presies die teenoorgestelde gedoen het as waarvoor Balak hom laat haal het, het Balak geweier om Bileam te betaal vir sy dienste.

Om wraak te neem op God het Bileam toe later weer na Balak toe teruggegaan.

- Hy het vir Balak gaan vertel dat hy nie die volk Israel teen die wil van God in kon vervloek nie.
- Hy het egter vir Balak ander raad gegee: Balak moet sy volk se jongmeisies stuur om die Israelitiese mans te verlei.
- Dit sal die Here kwaad maak, want die Here het sy volk verbied om met ander volke te meng.

Verder het hy gesê dat Balak die Israeliete na die afgodsoffers toe moes verlei, want dit sou finaal die toorn van die Here opwek, en dan sou die Here hulle straf.

- Hierdie selfde leer is nou deur die Nikolaïete geleer.
- Die Christene kan maar saam met die heidene afgodsoffers eet, en kon ook maar saam met hulle hoereer.
- Dit was na hulle mening heeltemal te eng om by die strengheid van die kerk te bly in sake soos dié.

Die gemeente van Efese het 'n baie swaar stryd gehad met hierdie Nikolaïete, want hulle het profetesse gehad wat hulle dit ten doel moes stel om die Christene te verlei.

- Daarom lees ons van die besondere lof wat die Here vir hierdie gemeente het omdat hulle die werke van die Nikolaïete gehaat het, wat die Here ook gehaat het.

Maar dan breek alles meteens af.

- Ons begin die skadu-kant van God se beoordeling van die gemeente in Efese hoor.
  - Hulle het hulle eerste liefde verlaat.
  - Hulle het God verlaat.

Die gemeente se eerste liefde was mos dat hulle ter wille van die Here se eer nie die kwaad kon verdra nie.

Die Here is baie ernstig met hulle omdat hulle Hom verlaat het.

- Hy sê hulle moet hulle gou bekeer, anders kom Hy na hulle toe en Hy sal hulle kandelaar uit sy plek verwyder.
- Met ander woorde, as hulle nie terugkeer na die Here toe nie, sal Hy hulle laat ophou bestaan.

Die gemeente het hulle nie bekeer nie, en presies dit het toe gebeur.

- God dreig nie net nie.
- Hy hou woord.

Daarom het God die gemeente van Efese vernietig.

- Die pragtige en groot gemeente wat daar in Efese was, het al lankal verdwyn.
- Die Turke het die stad ingeval en dit verwoes totdat daar niks oorgebly het nie.
- Saam met die stad het die Christengemeente ook verdwyn.

Kyk net wat het gebeur: Die kerk van Efese het met sy streng tug en sy suiwer leer en al van God vervreem.

- Hoe moeilik dit ook al mag wees om hierdie twee sake bymekaar te bring, dit het in die gemeente van Efese gebeur.
- In hulle vurige ywer vir God het die kerk so begin ywer dat hulle by God verbygegaan het.

Wat was dan die probleem met die gemeente van Efese?

- Die probleem was dat hulle kon “nee!” sê!
- Hulle kon sterk standpunt inneem teen die wêreld.
- Hulle het beslis geweier om aan die wêreldse dinge deel te neem.

Hulle het die werke van die Nikolaiëte gehaat.

- In ons tyd sou ons die Nikolaiëte die mense met die dubbele standaard genoem het.
- Diegene onder ons wat deelneem aan aksies waar Christene nie gesien behoort te word nie.

Maar hier is 'n gevaar aan die saak gekoppel, en die Efesiërs het in die slagget geval.

- Hulle het naderhand “nee” gesê sonder dat dit 'n saak van die hart was.
- Hulle het hulle eerste liefde verlaat omdat hulle koud en verstandelik beredeneerd geraak het oor sake wat uit die hart moes kom.
- Hulle het hulle kerk verdedig, en hulle het geweet wat is reg, sonder dat dit vir hulle 'n saak van belewenis was.

Godsdienst het 'n suiwer verstandsaak geword.

- Het ons nie dalk al baie soos die gemeente van Efese geword nie?
- Op watter manier doen ons afstand van die sonde, en draai ons ons rug op die verkeerde?
- Is dit omdat ons ten diepste gedryf word deur die Heilige Gees, en omdat hierdie afsku vir die kwaad in ons hart gewortel is?
- Of is dit maar net koue beredeneerdheid?

Daar is baie gelowiges wat wêreldlinge is, al stry hulle hoe hard dat dit nie so is nie!

Dan is daar weer ander wat van geloof 'n koue ongevoelige saak maak.

- Sulke mense werk met geloof soos met 'n regulasieboek – koud en formeel, sonder gevoel.
- Dis presies wat die Efesiërs oorgekom het.
  - Hulle het God se saak gestel en verdedig – maar heeltemal los van God af.
  - Dit het oor die saak gegaan, en nie oor die Here nie.
  - So het dit gebeur dat hulle vir die Here se saak geywer het sonder dat hulle God gedien het.

Ons loop dieselfde gevaar.

- Jaag jy die Jehovagetuie by jou voordeur weg omdat hy God Drie-Enig belaster en omdat hy hom nie deur die Heilige Gees wil laat oortuig nie? Of maak jy die deur toe omdat jy te min weet van die Here en van die Bybel om God se saak met liefde te kan verdedig?
- Daar is 'n belangrike verskil tussen die twee maniere van optree.

Antwoord vir uself op die volgende:

- Bestudeer ons werklik ons Bybel sodat die kennis van God in ons kan leef?
- Bestudeer ons werklik ons Bybel sodat ons kan leef in Christus wat in sy kerk beweeg?

*Daar is net een manier waarop ons God werklik sal kan ken, en dis om die Bybel werklik te lees en te bestudeer – die Bybel is God se openbaring wat Hy vir ons gegee het.*

Broeders en susters, is dit nie waar dat ons ook al – ten minste gedeeltelik – ons eerste liefde verlaat het nie?

- Dis asof ons onself voor die troon van die Here sien as ons hierdie brief aan die Efesiërs lees.
- Daarom word daar net so dringend vir ons gesê: Bekeer jou! Doen jou eerste werke, anders kom Ek gou na jou toe, en sal jou kandelaar van sy plek af verwyder as jy jou nie bekeer nie!

God het ons al in sy liefde besoek.

- Hy het aarde toe gekom en onder ons kom woon.
- Die Here Jesus Christus het baie smaad en veragting gely omdat Hy **nie** sy eerste liefde **verlaat het nie** – as mens het Hy net God en God alleen liefgehad en aanbid.
- Jesus was so pligsgetrou in sy liefde vir God dat Hy gaan sterf het sodat ons in die voorreg mag deel om dit ook te kan doen.

Die Here Jesus moes sy lewe gee sodat dit vir ons moontlik kon wees om ons eerste liefde getrou op God te rig, en hierdie eerste liefde van ons nooit te verlaat nie.

- Hy verwerf vir ons die krag daarvoor met sy opstanding.

Dit bring ons egter ook weer voor die gevaarpunt: Op Golgota loop oordeel en genade deur een punt.

- Daar is genade vir die wat stry om by hulle eerste liefde te bly.
- Net so is daar oordeel vir die wat God verlaat.

Waak daarteen dat u nie dalk die Here op so 'n manier dien dat u Hom nie meer dien nie. Waak daarteen dat u nie God met u verstand ken, maar met u hart ver van Hom af is nie. Daar gaan stryd wees om dit reg te kan doen. Daarom sê die Here: **Aan hom wat OORWIN.**

Oorwinning gaan saam met luister en onderwerping aan die Heilige Gees.

- Hy is tot hulp vir ons.
- Luister daarom dat Hy u leer om God met u verstand te ken – maar dat Hy u ook leer om die warmte van God se nabyheid te laat beleef.
- Glo met hart en verstand – glo in God met jou hele lewe.

**Amen.**

Slotgebed

Slotpsalm 119:60 (p. 598)

60 Tot U loop ek, op u hoop ek, / op u wette gee ek ag;  
en ek hou wat U getuig het / vol van liefde en stil ontsag.  
'k Voeg my stil na u bevele / mag ek die maar nooit vergeet!  
HEER, U weet dit – al my weë / is voor U wat alles weet.

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**